

28/10/2003

Pak Lah mampu teruskan `cara kita`

KUALA LUMPUR: Datuk Seri Abdullah Ahmad Badawi dianggap berupaya untuk meneruskan asas kepada pendekatan `cara kita` bagi membangunkan negara ini, seperti diilhamkan Datuk Seri Dr Mahathir Mohamad.

Presiden Pergerakan Keadilan Sedunia (Just), Dr Chandra Muzaffar, berkata apa yang dilakukan Perdana Menteri selama ini memang dianggap sebagai menentang arus terutama dalam usaha memulih ekonomi berdasarkan acuan sendiri.

"Kita harus membangun dengan cara kita sendiri. Ini bermakna kita harus pastikan pembangunan yang berpandu kepada nilai murni dan mulia seperti termaktub dalam budaya serta agama masyarakat kita.

"Kita tidak perlu tiru orang lain tanpa memikirkan kesan ke atas masyarakat kita. Jangan kita dewakan orang lain tanpa memahami kesan yang boleh memudaratkan kita," katanya ketika dihubungi semalam.

Beliau diminta mengulas kenyataan Dr Mahathir yang meminta supaya `cara kita` untuk membangunkan negara dikekalkan kerana ia terbukti berjaya, ketika berucap merasmikan Perhimpunan Agung Parti Progresif Penduduk Malaysia (PPP) kelmarin.

Perdana Menteri antara lain menyatakan: "Kita berjaya membina sebuah negara yang memberi kehidupan yang baik, yang membanggakan, dihormati oleh setiap orang. Kita sudah lakukan semua ini... our way (dengan cara kita).

Kita mesti sentiasa cuba dan pertahankan cara kita ini supaya Malaysia akan terus maju, membangun dan rakyatnya terus hidup selesa."

Dr Mahathir berkata, `cara kita` turut berjaya menyemarakkan perasaan baru di kalangan anak tempatan yang begitu bangga menjadi anak Malaysia walaupun menetap di negara lain.

Chandra berkata, apabila Dr Mahathir memperkenalkan dasar kawalan modal pada 1998, ia dianggap sebagai menentang arus kerana bercanggah dengan prinsip pasaran tetapi akhirnya terbukti berjaya.